

宋史新編

宋史新編卷十三

小紀十三

明南京戶部主事莆田柯維騏著

理宗

理宗建道備德大功復興烈文仁武聖明安孝皇帝諡  
昀太祖十世孫也太祖次子燕王德昭生次子冀王惟  
吉惟吉生四子廬江侯守度守度生嘉國公世括世括  
生房國公介稼介稼生脩武郎子奭贈太師吳國公子  
奭生伯忤贈太師益國公伯忤生師雅贈太師越國公  
師雅生希彊帝父也追封榮王母慈憲夫人全氏帝以  
開禧元年正月癸亥生於山陰有異瑞名與當時寧宗

弟沂靖惠王無嗣立宗室貴和爲後嘉定十三年景獻  
太子薨十四年六月遂立貴和爲皇子改名竑而以帝  
補秉義郎尋授右監門衛大將軍賜名貴誠立爲沂王  
後十五年五月封竑爲濟國公以帝爲邵州防禦使帝  
性凝重寡言潔脩好學會竑與丞相史彌遠有逆言彌  
遠日謀媒孽其失屬意於帝而未遂十七年秋八月壬  
辰寧宗疾篤彌遠稱詔以貴誠爲皇子改賜名昀授武  
泰軍節度使封成國公閏月丁酉寧宗崩彌遠使楊谷  
楊石入白楊皇后稱遺旨以皇子竑封濟陽郡王判寧  
國府命子昀嗣皇帝位事詳后傳既卽位大赦尊楊皇

后曰皇太后同聽政竝賜第湖州以醴泉觀使就第癸亥詔宮中服三年喪九月乙亥詔褒表老儒以傅伯成爲顯謨閣學士楊簡爲寶謨閣直學士竝提舉南京鴻慶宮柴中行敘復元職授右文殿修撰主管南京鴻慶宮伯成簡辭不至辛卯大饗明堂大赦冬十一月癸未以皇太后生日爲壽慶節戊子以葛洪同簽書樞密院事已丑詔以生日爲天基節十二月癸丑開經筵詔輔臣觀講

寶慶元年春正月壬戌朔詔舉賢良庚午湖州盜潘壬潘丙潘甫謀立濟王竝告于朝史彌遠遣客秦天錫

託宣醫治竑疾諭旨逼竑死尋詔貶竑爲巴陵郡公辛未楊谷楊石竑加開府儀同三司三月癸酉櫟寧宗于宋茂陵夏四月丁酉皇太后手書免垂簾聽政五月甲子詔內外文武大小之臣於國政有所見聞封章來上毋或有隱六月丁未史彌遠封魏國公秋八月癸卯詔知袁州趙鉞夫直祕閣福建提點刑獄以旌廉吏丙午詔舉廉吏戊申詔舉將才甲寅以程頤四世孫源爲籍田令冬十二月癸亥以薛極參知政事葛洪簽書樞密院事甲申朱端常言魏了翁封章謫訕真德秀奏劄誣詆詔貶了翁靖州居住德秀落職罷祠是年以梁成大

爲監察御史李知孝爲右正言

二年春正月癸亥詔賜沈煥陸九齡贈謚錄張九成呂祖謙張栻陸九淵子孫官有差癸酉召布衣李心傳赴闕三月戊寅詔太常寺建功臣閣凡累朝配享功臣趙普曹彬薛居正潘美石熙載李沆王旦李繼隆王曾呂夷簡曹瑋韓琦曾公亮富弼司馬光韓忠彥呂頤浩趙鼎韓世忠張俊陳康伯史浩葛邲趙汝愚悉圖其像名曰昭勳崇德閣秋八月乙巳濟王竑追降巴陵縣公是歲蒙古兵頻犯夏境夏主德旺以憂卒弟之子覲立三年春正月辛亥朔上皇太后尊號辛酉知楚州姚翀

朝辭奏淮楚軍事上曰南北皆吾赤子何分彼此卿其  
爲朕撫定之已巳詔朕觀朱熹集註大學論語孟子中  
庸發揮聖賢蘊奧有補治道朕勵志講學緬懷典刑可  
特贈熹太師封信國公後改徽國是月史彌遠楊谷楊  
石竝進秩三月庚戌朔工部侍郎朱在進對奏人主學  
問之要上曰先卿中庸序言之甚詳朕讀之不釋手恨  
不與同時丙寅史彌遠封魯國公夏六月戊申朔日有  
食之冬十一月辛巳日南至郊大赦改明年元十一月  
壬申蒙古兵破關外諸隘四川制置使鄭玠棄三關遁  
是歲蒙古兵入夏以夏主睨歸夏於是亡

紹定元年春正月丙子朔加上皇太后尊號夏六月壬寅朔日有食之秋七月己丑蒙古主鐵木真卒戊戌熒惑犯南斗冬十二月辛亥以薛極知樞密院事葛洪參知政事袁韶同知樞密院事鄭清之簽書樞密院事二年春二月庚戌詔歲舉廉吏或犯姦贓保任同坐三月辛卯詔恤獄囚夏五月詔振成都潼川路饑秋八月己未蒙古主窩闊台立

三年春二月庚戌詔起復趙范知鎮江府趙葵知滁州各節制本州屯戍軍馬秋九月辛丑大饗明堂大赦冬十月以趙善湘爲江淮制置使許便宜從事十一月丁



酉有星孛于天市垣十二月壬戌李全叛淮東官兵王  
青力戰死之詔江淮制臣趙善湘等率兵討李全乙丑  
以鄭清之參知政事喬行簡同簽書樞密院事詔史彌  
遠十日一赴都堂治事丁卯立貴妃謝氏爲皇后癸未  
加上皇太后尊號

四年春正月戊子皇太后壽七十詣慈明殿行慶禮大  
赦史彌遠以下進秩有差壬寅趙范趙葵等大敗李全  
於揚州全走新塘誅之立功將士進秩賜賚有差夏四  
月丁丑以喬行簡簽書樞密院事秋七月庚戌葛洪罷  
知紹興府八月己未蒙古兵破武休入興元攻仙人關

九月丙戌夜臨安火延及太廟語在五行志冬十月戊午太常少卿度正國史院編修官李心傳各疏言宗廟之制未合於古茲緣災異宜舉行之詔兩省侍從臺諫集議以聞癸酉蒙古兵破蜀口諸郡

五年春正月己丑以孟珙爲京西路兵馬鈐轄屯棗陽軍壬辰以史嵩之爲京湖安撫制置使知襄陽府壬寅新作太廟成夏五月己丑詔昨鬱攸爲災延及太室罪在朕躬而二三執政引咎去職今宗廟崇成神御安安薛極鄭清之喬行簡竝復元官戊戌詔今後齊民有罪監司守臣毋輒籍沒其家必具聞俟命秋七月丁酉以

陳貴誼同簽書樞密院事閏九月庚戌彗出角冬十月  
戊子以星變大赦十二月壬午皇太后楊氏崩癸卯詔  
外朝喪禮不敢輕改宮中自服三年時宋與蒙古合兵  
圍汴京金主奔蔡州蒙古再遣使議攻金史嵩之以鄒  
伸之報謝是歲起魏了翁連進寶章閣待制潼川安撫  
使知瀘州起真德秀爲徽猷閣待制知泉州

六年夏四月壬寅欽恭聖仁烈楊皇后于永茂陵是月  
蒙古攻金汴京破之殺其二王俘妃嬪宗室以歸秋七  
月孟珙大敗金武仙于馬蹬山降其衆七萬人八月史  
嵩之會蒙古伐金取唐州九月壬寅朔日有食之辛亥

大饗明堂大赦辛酉經筵官請以御製敬天法祖事親  
齊家四十八條及<sup>皇</sup>熙殿榜殿記宣付史館冬十月史  
嵩之遣孟珙江海領襄軍會蒙古合圍金主於蔡州丙  
戌史彌遠進太師左丞相知清之右丞相竝兼樞密使  
丁亥史彌遠封會稽郡王仍奉朝請以薛極爲樞密使  
喬行簡陳貴誼參知政事乙未左丞相史彌遠卒十一  
月丙午詔改明年元丙寅權工部尚書趙范言宣和海  
上之盟厥初甚堅迄以取禍其事不可不監帝嘉納之  
尋詔趙葵任責防禦是月刑部尚書莫澤侍郎梁成大  
工部尚書李知孝有罪相繼罷十二月庚辰薛極罷知

紹興府戊申資政殿學士袁詔以附史彌遠奪職罷祠  
壬辰臺臣言趙善湘陳賅鄭損通賄史彌遠怙勢肆姦  
失江淮荆襄蜀漢人心詔趙善湘有討李全功特寢免  
陳賅鄭損貶黜有差

端平元年春正月庚子朔詔求直言侍從卿監郎官在  
外執政從官舉堪爲監司守令者各二人三衙統帥知  
閤御帶環衛官在外總管軍帥舉堪爲將帥者各二人  
丙午詔趙范兼淮西制置副使任責防禦戊申金主守  
緒傳位于宗室承麟己酉金蔡州城破守緒自經死承  
麟爲亂兵所殺執其參知政事張天綱金於是亡丙寅

詔太師中書令榮王已進王爵宜封三代於是魯祖子  
奭祖伯仲父師雅竝贈太師封國公戊辰史嵩之露布  
告金亡謹遣郭春按循故壤詣奉先縣汛掃祖宗諸陵  
還師屯信陽命王旻守隨州王安國守棗陽蔣成守光  
化楊恢守均竝益兵飭備經理唐鄧屯田三月巳酉以  
賈涉子似道爲籍田令辛酉詔遣太常寺主簿朱揚祖  
閣門祇候林拓詣洛陽省謁八陵夏四月辛未詔遣朱  
復之詣八陵相度脩奉丁丑詔比年宗親貧窶或致失  
所甚非國家睦族之意太宗正司南外西外宗正司其  
申嚴州郡以時贍給違者有刑丙戌以滅金獲其主完

顏守緒遺骨告太廟其玉寶法物并俘囚張天綱完顏  
好海等命有司審實以聞庚寅詔孟珙江海等進秩賜  
賚有差五月丙辰以趙范爲兩淮制置使節制軍馬兼  
沿江制置副使丙寅詔黃榦李燔李道傳陳宓樓昉徐  
宜胡夢昱皆阨於權姦而各行其志沒齒無怨其賜謚  
復官仍錄其子以旌忠義戴林復元資以勵士風六月  
戊辰朔鄭清之等進奏選德殿柱有金書六字曰毋不  
敬思無邪上曰此左右銘也戊寅以喬行簡知樞密院  
事會從龍參知政事鄭性之簽書樞密院事己卯詔復  
濟王竑官爵有司檢視墓域以時致祭仍存恤其家癸

已史嵩之進兵部尚書秋八月議收復三京以趙范爲  
東京留守趙葵爲南京留守全子才爲西京留守已而  
趙葵將楊誼至洛爲蒙古所乘師大潰九月壬寅趙范  
奏趙葵全子才輕遣偏師復西京趙楷劉子澄參贊失  
計師退無律徐敏子范用吉怠於赴援詔葵子才各削  
一秩趙楷等并楊誼降黜有差已酉詔進士何霆編類  
朱熹解注文字有補經筵授上文學冬十月戶部尚書  
真德秀赴召進大學衍義尋改翰林學士魏了翁召權  
禮部尚書兼直學士院辛卯參知政事陳貴誼卒十二  
月已卯蒙古遣王檄來責數盟尋命鄒伸之等報謝是



年李知孝梁成大莫澤竝竄遠州盡追爵秩

二年春正月中寅詔議胡瑗孫明復邵雍歐陽脩周惇頤司馬光蘇軾張載程顥程頤等十人從祀孔子廟庭  
升孔伋十哲丙辰詔主管侍衛馬軍孟珙屯黃州措置  
邊防辛酉遣程市等爲蒙古通好使二月甲子朔日當  
食不虧二月乙未詔太學生陳均編宋長編綱目進士  
陳文蔚著尚書解竝補迪功郎乙巳以直德秀參知政  
事陳卓同簽書樞密院事夏四月辛卯直德秀罷予內  
祠兼侍讀未幾卒六月戊寅以鄭清之爲特進左丞相  
喬行簡爲右丞相竝兼樞密使壬午以曾從龍知樞密

院事崔與之參知政事鄭性之同知樞密院事陳卓簽  
書樞密院事崔與之辭不拜秋七月庚申禮部尚書魏  
了翁上十事不報閏七月丁亥貶金子才衡州居住劉  
子澄瑞州居住八月甲寅惠陽建安京口高沙諸軍作  
亂討平之詔曰朕仰惟藝祖皇帝立國以仁維國以義  
撫民馭軍恩威不相掩用能經制一定國勢奠安間者  
軍士蠢爲不靜以駭民聽雖怙終必戮而事非獲已痛  
切朕躬夫三綱五常之理在人未始泯絕彼其忘平時  
撫養之恩背理捐生豈盡本心哉有司奉令不虔故其  
病於倍尅而飢寒不免困於力役而休息無期鬱悒於

阻遏而赴愬無所殆非一日亦惟朕之不明有以致之  
詩不云乎祈父王之爪牙胡轉予于恤內而三衙外而  
列閫暨諸軍主兵官其各體至意上下交飭訓禮示信  
威以儆其玩恩以卹其私使人人自愛相安于紀律而  
國勢張時惟汝嘉徂故必罰朕不敢赦冬十一月乙丑  
以曾從龍爲樞密使督視江淮軍馬魏了翁同簽書樞  
密院事督視京湖軍馬未幾從龍卒十二月庚寅以魏  
了翁兼督視江淮軍馬甲辰以余嶸同簽書樞密院事  
是歲安南來貢蒙古分道入侵蜀漢江淮州郡詔籍鄭  
損家連貶南劍州居住

三年春正月蒙古兵攻江陵統制李復明奮戰死之  
月壬寅詔侍從臺諫給舍條具邊防事宜甲辰召魏了  
翁簽書樞密院事辭不拜三月襄陽北軍主將王旻李  
伯淵焚城郭倉庫相繼降蒙古時城中官民兵四萬七  
千有奇財粟三十萬軍器二十四庫皆亡金銀鹽鈔不  
與焉南軍主將李虎乘火縱掠襄陽爲空制置使趙范  
坐失撫御削三官夏四月己酉魏了翁罷知潭州癸丑  
詔悔開邊責已其略曰數年之間多難已甚屬讎金之  
寢滅而蒙古之與鄰逮合謀成破蔡之功恐假道有及  
虞之勢心之憂矣臍可噬乎又曰兵民之死戰鬪戶口

之困流離室廬靡存骸骨相望是皆朕明不能燭德有  
未孚上無以格天心下無以定民志今方施令發政以  
爲綏輯之圖補卒蒐乘以嚴守禦之備想瘡痍之溢目  
如疾病之在身五月甲申以趙葵爲淮東安撫制置使  
知揚州秋七月丁卯以鄭性之參知政事李鳴復簽書  
樞密院事甲申雨血八月丙戌趙范坐失襄城罪再貶  
秩建寧府居住李虎亦貶秩各令任責捍禦自效九月  
辛未大饗明堂大赦乙亥鄭清之喬行簡竝罷爲醴泉  
觀使兼侍讀以崔與之爲右丞相兼樞密使辭不拜壬  
午御前諸軍統制曹友聞與蒙古兵戰于大安軍陽平

關死之冬十月壬寅蒙古兵陷固始縣丙午蒙古兵陷  
文州守臣劉銳通判趙汝鼎死之十一月壬寅以喬行  
簡爲特進左丞相兼樞密使蒙古兵入淮西詔史嵩之  
趙葵陳韓分道援之戊辰以魏了翁知紹興兼浙東安  
撫使壬申詔羣臣各陳防邊方略戊寅復成都府十二  
月壬寅詔改明年元是歲余州通判蹇彝及其弟參軍  
事維之子永叔與蒙古兵拒戰俱死焉安南來貢

嘉熙元年春正月甲子詔兩淮荆襄之民避地江南沿  
江州縣間有招集振恤常慮恩惠不周流離失所江陰  
鎮江建寧太平池江興國鄂岳江陵境內流民其計口

給米期十日竣事以聞二月癸未朔以鄭性之知樞密院事鄒應龍簽書樞密院事李宗勉同簽書樞密院事李鳴復罷知紹興府癸卯詔以朱熹通鑑綱目下國子監并進經筵夏五月壬申臨安大火六月癸巳鄒應龍罷知慶元府丙午詔建內小學擇宗子十歲以下資質美者二三人置師教之秋八月癸巳以李鳴復參知政事李宗勉簽書樞密院事甲辰詔蜀雞冠隘都統王宣戰歿其總管吳桂棄所守走又縱部伍剽劫貶官勒停冬十二月戊寅朔日有食之太史先期言是日日食將既日與金木水火四星俱經于斗詔損膳避朝以圖消

弭

二年春正月戊申朔詔又武羣臣舉曉暢兵財各二人  
三衙諸軍統制舉將材各二人二月戊戌詔近覽李璠  
奏知蜀漸次收復然創殘之際綏撫爲急宜施湯宥之  
澤淮西被兵恩澤亦如之其降德音諭朕軫恤之意蒙  
古再造王楫來三月己丑遣周次說等爲蒙古通好使  
夏五月癸未以李鳴復知樞密院事李宗勉參知政事  
余天錫簽書樞密院事甲申嚴州布衣錢時成忠郎吳  
如愚以隱居著書並選爲祕閣校勘丙戌以李鳴復參  
知政事冬十月己巳日生黑子辛未復光州十二月丙



午董誥臣坐棄光州伏誅

三年春正月癸酉以喬行簡爲少傅平章軍國重事李宗勉爲左丞相兼樞密使史嵩之爲右丞相兼樞密使督視兩淮四川京湖軍馬余天錫參知政事游侶簽書樞密院事秋八月戊戌以游侶參知政事許應龍簽書樞密院事林略同簽書樞密院事九月辛巳大饗明堂大赦冬十月許應龍林略罷十一月丙子以范鍾簽書樞密院事十二月甲子復夔州

四年春正月辛未彗出營室庚辰詔曰朕以眇身托于天下士民公卿之上顧德不類不能上全三光之明下

遂羣生之和變異頻仍咎證彰灼夙夜祇懼不遑康寧  
乃正月辛未有流星見于營室太史氏占厥名曰彗災  
孰大焉天道不遠譴告匪虛人主朕痛自克責豈聲利未  
遠而讒諛乘間歟舉措未公而賢否雜進歟賞罰未當  
而真偽無別歟抑牧守匪良而狂欲多興歟封人弛備  
而暴客肆志歟道殣相望而流離無歸歟四方多警而  
朕不悟羣黎有苦而朕不知歟謫見上帝象甚著明爰  
避正殿減常膳以示側身脩行之意二三大臣吾道揆  
也其協恭以輔朕百爾執事吾法守也其竭忠以告朕  
使朕得以導和消異不亦善乎布告中外咸知朕意二

月癸丑以孟珙爲四川宣撫使夏四月乙巳召督視軍馬右丞相史嵩之還六月江浙福建大旱蝗秋七月乙丑詔今夏六月恒暘飛蝗爲孽朕德未脩民瘼尤甚中外臣僚其直言闕失無隱又詔有司振災恤刑九月喬行簡罷冬十月癸巳詔改明年元十二月丙辰地震已未詔求直言閏十二月丙寅左丞相李宗勉卒以游侶知樞密院事范鍾參知政事徐榮叟簽書樞密院事淳祐元年春正月庚寅朔詔舉文武才甲辰詔曰朕惟孔子之道自孟軻後不得其傳至我朝周惇頤張載程顥程頤眞見實踐深探聖域子載絕學始有指歸中興

以來又得朱熹精思明辨表裏混融使大學論孟中庸  
之書本末洞徹孔子之道益以大明于世朕每觀五臣  
論著啓沃良多今視學有日其令學官列詣從祀以示  
崇獎之意尋黜王安石從祀語在安石傳中丙午封周  
惇頤爲汝南伯張載郇伯程顥河南伯程頤伊陽伯戊  
申幸太學謁孔子遂御崇化堂祭酒進講監學官諸生  
進秩賜賚有差製道統十三贊就賜國子監宣示諸生  
復親書朱熹白鹿洞學規賜焉夏四月丁丑詔以弟與  
芮爲開府儀同三司萬壽觀使嗣榮王貴謙爲開府儀  
同三司嗣沂王冬十一月辛卯蒙古主窩闊台卒后主

國事十二月丁丑侍御史金淵劾前四川制置副使彭大雅貪黷殘忍蜀人銜怨乞更竄責詔除名贛州居住是冬蒙古兵攻普州知州何叔丁判官楊仁舉闔家遇害蒙古兵圍成都制置使陳隆之一家數百口竝遇害蒙古遣使來議和至淮上守將囚之

二年春二月甲戌游倡罷知紹興府以范鍾知樞密院事徐榮叟參知政事趙葵同知樞密院事別之傑簽書樞密院事夏五月己酉趙葵罷知潭州六月壬子朔徐榮叟罷提舉洞霄宮丁巳以余玠爲四川宣諭使未幾授制置使丙寅以別之傑同知樞密院事高定子簽書

樞密院事杜範同簽書樞密院事是月盛夏積雨浙右大水秋七月常潤建康六水兩淮尤甚九月庚辰朔日有食之辛卯大饗明堂大赦今十月蒙古兵大入通州守臣杜震載其私帑遁十一月辛卯詔諭兩淮節制李曾伯毋以通州被兵之故不安厥職其督勵諸將勉圖後功己亥日南至雷電交作詔省躬求直言十二月癸亥蒙古兵連攻敘州都統楊大全拒戰死之內寅別之傑罷知潭州

三年春正月戊寅以高定子兼參知政事未幾罷二月丁丑朔日有食之夏四月壬申布衣王與之進所著周

禮訂議袖下州文學是年蒙古兵破大安軍忠義副總管楊世威堅守魚孔隘詔世威就知大安軍

四年春正月壬寅朔帝製訓廉謹刑二銘戒飭中外以李鳴復參知政事杜範同知樞密院事劉伯正簽書樞密院事夏五月戊午蒙古兵圍壽春府呂文德節制水陸諸軍解圍有功詔赴樞密院稟議六月庚午朔以呂文德兼淮西招撫使知濠州秋九月甲辰右丞相史嵩之父喪起復將作監徐元杰太學生黃愷伯等相繼論之俱不報冬十二月庚午以范鍾爲左丞相杜範爲右丞相並兼樞密使游偁知樞密院事劉伯正參知政事

右丞相史嵩之許終喪甲戌以趙葵同知樞密院事

五年春正月乙卯以李性傳簽書樞密院事三月庚子

詔嚴賊吏法夏四月丙戌右丞相杜範卒秋七月癸巳

朔日有食之九月辛亥大饗明堂奉太祖太宗寧宗並

侑大赦冬十二月己卯以游侶爲右丞相兼樞密使趙

葵知樞密院事李性傳同知樞密院事性傳尋罷壬午

以太史奏日食明年正旦詔避殿減膳百司講行闕政

凡可以消弭災變者直言無隱是歲工部侍郎徐元杰

侍御史劉漢弼以嘗論史嵩之相繼暴卒太學生爲訟

冤詔各給田五百畝緡錢五千恤其家蒙古兵入蜀權



巴州何震權成都府馮有碩權漢州王驤權成都縣楊  
兌權資州劉永權潼川府魏靄死之將領關貴統制白  
傅才率衆復洋州還遇敵兵六戰將士百五十三人俱  
沒于陣詔各贈卹

六年春正月辛卯朔日有食之二月戊辰范鍾罷爲醴  
泉觀使夏四月戊寅詔授朱熹門人胡安定呂壽慈模  
迪功郎本州學教授給札錄其著述并條其所欲言者  
以聞六月壬子以陳韓參知政事秋七月蒙古主貴由  
立八月癸丑以祕書少監兼史館劉克莊兼崇政殿說  
書九月戊辰以賈似道爲京湖制置使冬十二月乙未

詔許史嵩之致仕臺諫論其無父無君罪有餘誅請削官遠竄

七年春正月乙卯朔詔間者紕逐非才收召衆正史嵩之已令致仕示不復用咨爾三大臣其一乃心務舉實政以輯寧我邦家若辭浮于實玩愒歲月朕何賴焉夏四月庚子以王伯大簽書樞密院事吳潛同簽書樞密院事辛丑以鄭清之爲右丞相兼樞密使游侶罷爲醴泉觀使以趙葵爲樞密使督視江淮京西湖北軍馬陳韓知樞密院事湖南安撫大使知潭州甲辰趙葵兼知建康府行宮留守江東安撫使五月乙亥策士詔求

直言弭旱六月丙申以旱避殿減膳詔中外臣庶直陳  
過失母有所諱戊申詔旱勢未釋兩淮蜀襄及江閩內  
地曾經兵州縣遺骸暴露感傷和氣所屬有司牧瘞之  
秋七月乙丑吳潛罷知福州丁卯以別之傑參知政事  
鄭家同簽書樞密院事案未幾罷八月辛卯乃雨

八年春二月乙未福安縣民羅母年過百歲特封孺人  
有司歲時存問以厚風化三月蒙古主貴由卒后主國  
事夏六月戊戌以徐鹿卿爲樞密使秋七月辛亥以下  
伯大參知政事應繇同知樞密院事謝方叔簽書樞密  
院事史宅之同簽書樞密院事伯大尋罷知建寧府九

月辛酉大饗明堂大赦是日雷冬十月甲戌朔別之儀  
罷知紹興府

九年春正月詔給官田五百畝命臨安府創慈幼局收  
養道路遺棄初生嬰兒仍置藥局療貧民疾病閏二月  
甲辰以鄭清之爲左丞相兼樞密使封魏國公趙葵爲  
右丞相兼樞密使應麟謝方叔竝參知政事史宅之同  
知樞密院事夏四月壬寅朔日有食之六月丙寅詔邊  
郡各立廟一賜額褒忠凡沒于王事忠節顯著者竝祠  
焉守臣春秋致祀冬十一月癸未應麟罷知平江府十  
二月乙巳以吳潛同知樞密院事徐榮叟簽書樞密院

事戊午同知樞密院事史宅之卒

十年春三月癸未趙葵罷爲體泉觀使冬十月辛酉詔諸主兵官行罰毋杖脊傷人命十一月壬申以趙葵判潭州湖南安撫大使是歲台州嚴州水振之

十一年春三月戊寅以謝方叔知樞密院事吳潛參知政事徐清叟同知樞密院事夏四月戊戌潭州民林符三世孝行一門義居福州陳氏笄年守志壽逾九袞詔皆旌表其門六月乙巳詔求遺書并山林之士有著述者許上進是月蒙古主蒙哥立秋八月辛亥詔比覽林光世易範明易椎星配象演義有司其以禮津遣赴闕

九月辛未大饗明堂大赦冬十一月庚戌左丞相鄭清之卒甲寅以謝方叔爲左丞相吳潛爲右丞相並兼樞密使乙卯以徐清叟參知政事黃槐簽書樞密院事是月京湖都統高達等復襄樊十二月戊辰詔以八事訓飭在廷曰肅紀綱用正人救楮幣固邊陲清吏道淑士氣完軍制結人心

十二年春正月辛丑太學錄楊懋卿以孝行卓異詔旌其門二月乙卯朔日有食之壬午詔襄郢新復蠲賦稅蒙古兵復攻隨郢安復副總管馬榮率將士連日拒戰却之夏五月乙巳信州玉山縣盜起詔罷諸郡經界秋

八月丁丑班會天曆辛巳詔改明年元冬十月癸丑以  
徐清叟參知政事董槐同知樞密院事壬申詔襄郢新  
復其務措置屯田脩渠堰十一月庚寅吳潛罷尋提舉  
江州太平興國宮丙申夜臨安大火越夕乃熄詔求直  
言是歲閩浙八州郡大水振之

寶祐元年春正月庚寅朔詔以姪孜爲皇子改賜名祺  
封永嘉郡王製資善堂記賜之癸卯蒙古兵渡漢江入  
西柳關京湖都統高達帥兵禦之二月巳酉朔日有食  
之夏四月乙未詔侍從臺諫給舍制司各舉帥才二人  
五月甲午召四川制置使余玠還未幾暴卒秋八月丙

辰以余晦爲四川安撫制置使知重慶府是歲江湖閩  
廣旱溫台處三州大水振之

二年春二月甲辰朔詔太常釐正秦檜謚庚申詔饒州  
布衣饒魯不事科舉一意經學授州教授三月壬午王  
善使蒙古留七年來歸夏四月乙丑以徐清叟知樞密  
院事董槐參知政事六月甲寅侍御史吳燧等論故蜀  
帥余玠聚斂罔利玠死其子如孫盡竊帑庾之積以歸  
詔籍其家庚午召四川制置使余晦還閏六月壬申參  
知政事董槐以邊事孔棘請自帥蜀優詔不允壬午以  
李曾伯爲四川宣撫使秋九月辛亥大饗明堂大赦冬



十月癸酉皇子禩進封忠王是歲蒙古城利州閬州知閬州兼利西安撫王惟忠下詔欲籍其家斬都市

三年春正月己未迅雷明日起居郎牟子才疏言元夜張燈侈靡倡優狎嫖有累聖德乞寢罷以應天變從之夏六月丙子以王埜簽書樞密院事未幾罷是月監察御史洪天錫劾內官盧允升董宋臣不報秋七月壬戌謝方叔罷提舉洞霄宮八月乙丑徐清叟罷提舉王隆萬壽觀以董槐爲右丞相兼樞密使程元鳳簽書樞密院事蔡杭同簽書樞密院事是歲治入洛啓釁罪今子才劉子澄各罷祠

四年春三月丙辰帝製字民訓賜改秩親民官夏四月  
癸未以程元鳳參知政事蔡杭同知樞密院事賈似道  
參知政事依舊督兵甲辰羅氏鬼國遣報思播言蒙古  
將由大理取道西南大入邊詔以銀萬兩使思播結約  
羅鬼爲援六月癸未侍御史丁大全疏擊右丞相董槐  
夜半以臺牒役隅兵迫出關遂罷相三學生屢上書以  
爲言詔槐提舉洞霄宮秋七月甲寅知敎州史俊調舟  
師連與蒙古兵戰却之乙卯以程元鳳爲右丞相兼樞  
密使蔡杭參知政事張礪簽書樞密院事九月甲寅監  
察御史朱熠言境土日蹙調度日廣乞汰冗吏不報冬

十一月戊戌京湖閫臣繼上戰功詔曰蜀惟兵革吾民  
重困所當勞來撫摩使之樂業比聞官吏乃肆誅求殊  
失培植邦本之意自今四川制司戒飭屬郡違者罪無  
赦御史臺其嚴覺察癸丑詔戒羣臣洗心飭行毋縱于  
貨賄其或不悛舉行淳熙成法又開國以來勲臣之裔  
有能世濟其美而不世其祿者所在州郡以聞以張礪  
同知樞密院事丁大全簽書樞密院事馬天驥同簽書  
樞密院事蔡抗輒擅去國奪職奉祠十二月庚申蒙古  
城棗陽

五年春正月丁亥朔賈似道進知樞密院事依舊督兵

以吳淵參知政事淵未上卒夏四月蒙古兵犯襄陽安撫高達力戰于白河却之蒙古兵攻苦竹隘詔京湖調兵應援六月丁酉馬天驥罷秋八月庚子以張礪參知政事丁大全同知樞密院事礪未幾卒九月辛酉大饗明堂大赦冬十月丁酉以林存發書樞密院事十一月乙丑獎諭安南國賜賚之庚辰詔三邊郡縣官毋擅離職守帥臣其嚴糾察

六年春正月辛亥朔以丁大全參知政事二月辛巳朔以馬光祖爲京湖制置使尋兼荆湖北路安撫使夏四月乙巳程元鳳罷判福州丁未以丁大全爲右丞相兼

樞密使林存同知樞密院事朱熠簽書樞密院事是月  
蒙古主率諸將兵號十萬分三道來侵一趨散關一趨  
朱倉關一趨沔州冬十月戊子蒙古將李璫率兵犯通  
泰州十一月巳酉林存罷知建寧府壬子以朱熠同知  
樞密院事饒虎臣同簽書樞密院事賈似道進樞密使  
爲兩淮宣撫使丁卯李璫犯海州漣水軍海州通判侯  
畝鏖戰死之闔室遇害餘將士殺傷殆盡賈似道抗章  
引咎詔以功自贖十二月戊寅詔改明年元庚辰蒙古  
兵渡馬湖入蜀詔馬光祖向土壁暫移司峽州以便策  
應土壁光祖尋敗蒙古兵於房州是歲臨安大旱

開慶元年春正月丁卯以賈似道爲京西湖南湖北四川  
宣撫大使是月蒙古兵攻忠涪州破利州隆慶順慶諸  
郡閬蓬廣安守將相繼降蒙古又造浮梁于涪之蘭市  
三月丁巳以呂文德爲四川制置副使夏六月辛巳以  
朱熠參知政事饒虎臣同知樞密院事秋七月蒙古兵  
圍合州自二月至于是月守臣王堅固守力戰蒙古主  
蒙哥卒于城下乃解圍九月壬子賈似道表言蒙古兵  
自黃州浚武口渡江圍鄂州中外震動庚申以戴慶炯  
簽書樞密院事是日下詔責已勉諭諸閫進兵冬十月  
辛未朔丁大企罷判鎮江府壬申以吳潛爲左丞相兼

樞密使賈似道爲右丞相兼樞密使依舊督兵庚辰詔  
自今十一日始避殿減膳徹樂又詔曰比者蜀道稍寧  
然干戈之餘瘡痍未復流離蕩析生理何資咨爾蜀宣  
之寄牧守之臣輕徭薄賦一意撫摩恤軍勞民庶底興  
復其被兵百姓遷入城郭無以自存者三省下各郡以  
財粟振之十一月乙卯以趙葵爲江東西宣撫使許便  
宜行事閏月丁丑以向士璧爲湖南制置副使知潭州  
甲申以呂文德爲京西湖北安撫使兼制置使知鄂州  
十二月己亥賈似道私與蒙古議和奏鄂州圍解詔論  
功行賞辛亥詔改明年元是歲屢出內帑銀帛緡錢犒

師發義倉米振臨安湖北及婺州饑

景定元年春二月辛酉蒙古遣偏師取道大理由廣南  
抵衡州向土壁合劉雄飛兵逆戰于道敗之獲還俘民  
甚衆丙寅蒙古兵犯分寧武寧二縣河湖砦都監張興  
宗死之三月戊辰朔日有食之乙亥詔全岳來衡柳象  
瑞興國南康隆興江州臨江潭州經兵諸縣農民失業  
應開慶元年二稅盡除之辛卯蒙古主忽必烈立是月  
蒙古兵至漢陽鄂州統制張勝力戰死之賈似道言自  
鄂趨黃與敵遇大戰敗之夏四月戊戌朔侍御史沈炎  
疏左相吳潛罪請速詔賈似道正位鼎軸己亥賈似道



以計殺蒙古鄂州殿兵上表奏捷己酉吳潛罷提舉洞  
霄宮癸丑召還賈似道進少師封衛國公以朱熠知樞  
密院事饒虎臣參知政事戴慶炯同知樞密院事皮龍  
榮簽書樞密院事未幾虎臣罷慶炯卒五月癸未以沈  
炎同簽書樞密院事六月壬寅詔立忠王禔爲皇太子  
賜字長源甲寅以楊棟葉夢鼎並爲太子詹事秋七月  
丁卯朔大赦己丑御史何夢然劾丁大全吳潛欺君無  
君之罪庚寅以賈似道兼太子少師朱熠皮龍榮沈炎  
兼太子賓客辛卯詔丁大全削三秩南安軍居住吳潛  
奪觀文殿大學士罷祠建昌軍居住癸巳詔舉孝廉是

月蒙古遣郝經來修好且徵歲幣賈似道隱其事幽經  
真州上聞使至謂宰執曰北朝使來事體當議似道奏  
曰和出彼謀豈容輕徇若以交鄰國之道來當令入見  
九月辛巳大饗明堂大赦冬十月甲辰詔黨于大全吳  
潛者臺諫其嚴覺察舉劾以聞當寘于法以爲同惡相  
濟者之戒壬戌再貶吳潛潮州居住十二月辛丑建陽  
縣嘉禾生一本十五穗詔改建陽爲嘉禾縣

二年春正月丁丑命皇太子謁孔子于太學乙酉以皇  
太子請詔封張栻爲華陽伯呂祖謙開封伯從祀孔子  
廟庭三月壬戌朔日有食之夏四月乙未以皮龍榮參

知政事沈炎同知樞密院事何夢然簽書樞密院事乙卯竄吳潛于循州丙辰竄丁大全于貴州追削二秩秋七月甲子蜀帥俞興奏知瀘州劉整率所部兵降蒙古由會計邊費爲興所按也戊寅王惟忠家訟冤詔奪謝方叔應得恩數丁大全責授新州團練使貴州安置丙戌吳潛責授化州團練使循州安置竟卒貶所八月壬辰以呂文德兼四川宣撫使乙巳以江萬里同簽書樞密院事是月向士璧坐冒邊費貶漳州安置復被逮責償以死趙葵史岩之等俱責償貶黜有差語在賈似道傳九月乙亥蒙古使郝經文留真州帝趣與賜賚冬十

月丙午以何夢然同知樞密院事丙辰沈炎罷提舉洞  
霄宮十二月辛卯宰臣奏太子語臣等言近奉聖訓大  
婦之道王化之基男女正位天地大義平日所講修身  
齊家之道當真履實踐勿爲口耳之學請宣付史館永  
爲世程法從之甲午以何夢然參知政事壬寅江萬里  
罷提舉洞霄宮癸卯開全氏爲皇太子妃是歲臨安大  
雨水湖秀州水振之安南來貢

三年春正月戊子朔詔量移丁大全吳潛黨人永不錄  
用庚午賜賈似道第宅于集芳園給緡錢百萬就建家  
廟二月丁亥朔皮龍榮罷知潭州庚戌蒙古將李壇以

運海三城來歸獻山東郡縣詔封壇齊郡王復其父李  
全官爵三月乙丑以孫附鳳簽書樞密院事夏六月庚  
寅以楊棟同簽書樞密院事庚戌安南陳日熒上表乞  
世襲詔日熒及男威晃俱授安南國王語在交趾傳秋  
八月戊戌蒙古兵陷濟南殺李壇事聞詔嚴邊防九月  
丁丑溫州布衣李元老讀書安貧不事科舉年百有四  
歲詔授迪功郎致仕本郡給俸冬十月甲子以楊棟簽  
書樞密院事葉夢鼎同簽書樞密院事並兼太子賓客  
十一月壬辰詔奪丁大全團練使新州安置道死  
四年春正月壬子詔侍從臺諫給舍卿監郎官以上及

制總監司各舉所知不拘員限不如所舉行連坐法戊子林希逸言莆陽布衣林亦之陳藻有道之士林公遇幼承父澤奉親不仕詔贈亦之藻迪功郎公遇進贈一官二月丁巳置公田所以劉良貴等領之夏五月丁酉婺州布衣何基建寧府布衣徐幾皆得理學之傳詔竝授迪功郎本州府教授兼書院山長秋九月辛卯大饗明堂大赦甲午以何夢然知樞密院事楊棟同知樞密院事葉夢鼎簽書樞密院事

五年春正月丁丑朔詔曰朕粵稽盛帝明王制治保邦曷嘗不以人材爲先務蓋雖堯舜之法度文武之方策

苟非得人是迪是循則亦徒法而已故必賴濟濟之賢  
藹藹之士布列中外道德一而風俗同然後可望其舉  
行不悖相繼於長久也我國家因之舊進士一科得人  
爲盛三百年間所以保乂王家垂休億載者厥功茂哉  
弊乂蠹滋近年尤甚非無佳士穎出由此其選然窮經  
學古者或病於詞華植德礪行者難究其蘊奧高才大  
器者往往局於纖悉繩墨之末是以官甚冗而才愈乏  
家殊俗而風益漓至於冒國法以苟營假儒冠而挾策  
俚言亂雅勦說趨時使習之者反賊其良而取之者莫  
任其咎人情至此咸欲變通蓋披閱先朝名臣奏議其

論取士之法非一惟程顥頤兄弟深知治道酌古通今  
綱條詳明用意純切令三省詳議叅酌其可行者條具  
以聞務於科舉令甲無大更張以妥妥士心而於進士  
舉之外所以崇尚經術考察德行選用材能之道立爲  
一代之典陶成四方之風庶幾豐芑之仁垂之萬世顧  
不美歟癸巳出奉宸庫珠香象犀下務場貨易助收楮  
幣夏四月戊午太白晝見五月庚辰何夢然罷知建寧  
府辛卯以楊棟參知政事葉夢鼎同知樞密院事姚希  
得同簽書樞密院事乙未安南奉表謝恩進方物詔却  
之仍厚賚以獎恭順己亥太白經天晝見秋七月甲戌



彗星出于柳丁丑詔避殿減膳求直言言者皆云變由公田賈似道奏辨乞避位帝勉留之曰言事易任事難自古然也卿旣任事亦當任怨丙申臺臣言楊棟指彗星爲蚩尤旗欺天罔君詔棟罷職予祠九月乙未左司諫舒有開劾建寧府教授謝枋得校文發策怨望騰謗貶興國軍居住是月行經界推排法由是江南尺寸之地皆有稅冬十月乙丑詔行關子銅錢法是日帝不豫丁卯帝崩在位四十一年年六十遺詔皇太子禔卽皇帝位咸淳二年十二月上尊謚廟號理宗

論曰有天下者貴正始理宗之立出於史彌遠矯命俾

濟三不得其死可謂不幸矣享國四十餘年彌遠權寵  
終其身丁大全賈似道相繼任政陰邪得志國事日舛  
自古臨亂之君各賢其臣槩如是也載考當時諫臣方  
大宗等每以女寵侈費爲言則色荒政怠亂所由生徒  
飾崇儒講藝之虛名曷益乎

宋史新編卷十三

宋史新編卷十四

本紀十四

明南京戶部主事莆田柯維騏著

度宗

度宗端文明武景孝皇帝諱昀理宗母弟嗣榮王與芮之子也母夫人錢氏所生母夫人黃氏嘉熙四年四月九日生帝于紹興榮邸資識內慧七歲始言言必合度理宗晚無子屬意託神器焉淳祐中賜名孟啓歷授慶遠軍節度使封益國公後又改名孜封建安郡王寶祐元年立爲皇子改今名授崇慶軍節度使開府儀同三司封永嘉郡王二年十月進封忠王十一月加元服字

邦壽五年授鎮南遂安軍節度使景定元年六月立爲  
皇太子賜字長源時理宗家教甚嚴雞初鳴問安再鳴  
回宮三鳴往會議所參決庶事退入講堂講經史終日  
手不釋卷將晡復入起居率爲常理宗問今日講何經  
答之是則賜坐賜茶否則爲之反覆剖析又不通則繼  
以怒明日須更覆講五年十月丁卯理宗崩受遺詔卽  
皇帝位戊辰尊皇后謝氏曰皇太后以生日爲壽崇節  
辛未大赦十一月詔曰京師諸夏根本民氣宜紓先帝  
罷諸行厚之使勿困也帥漕兩司合蠲近例歲貢以補  
助其乏缺所當繼志以副先帝培護根本之意又詔求

直言又詔躬行三年喪加嗣榮王與芮武康寧江軍節  
度使依前太師判宗正事臺臣劾宦官李忠輔何舜卿  
等竝竄遠方以葉夢鼎參知政事姚希得同知樞密院  
事十二月壬寅戒賊吏絕貢羨餘甲辰詔以生日爲乾  
會節初開經筵名講殿曰熙明禮部尚書馬廷鸞進讀  
大學衍義序陳心法之要是歲兩浙江東西湖南北廣  
東西福建成都京西潼川夔利路戶五百六十九萬六  
千九百八十九口一千三百二萬六千五百三十二  
咸淳元年春正月辛未朔日有食之二月丁未以姚希  
得參知政事江萬里同知樞密院事庚申置籍中書記

諫官御史言事歲終以考成績壬戌以王燾簽書樞密院事三月甲申攢理宗于永穆陵夏四月戊午賈似道特授太師閏五月丁未以江萬里參知政事王燾同知樞密院事馬廷鸾簽書樞密院事秋八月蒙古將阿朮帥兵至廬州及安慶諸路統制范勝統領張林正將高與副將孟興逆戰死之冬十一月辛丑以留夢炎簽書樞密院事

二年春正月癸丑江萬里罷知潭州二月辛卯詔左右史循舊制立侍御坐前夏四月壬午姚希得罷提舉洞霄宮丁亥王燾罷五月甲寅以王燾參知政事留夢炎

同知樞密院事包恢簽書樞密院事秋七月壬寅罷童  
子科是歲安南來貢

三年春正月己丑朔郊大赦丁酉上皇太后尊號壬辰  
以王燾知樞密院事葉夢鼎參知政事常挺簽書樞密  
院事癸卯立全氏爲皇后戊申帝詣太學謁孔子以顏  
淵曾參孔伋孟軻配享顓孫師升十哲邵雍司馬光升  
列從祀雍封新安伯禮部尚書陳宗禮國子祭酒陳宜  
中進讀中庸明日執經官弁各學官俱進秩諸生推恩  
有差二月己未復廣安軍乙丑詔賈似道太師平章軍  
國重事三日一朝治事都堂三月壬辰以程元鳳爲右

丞相兼樞密使尋罷夏五月丁亥朔日有食之戊申詔  
曰比嘗命有司按月給百官奉惟官愈卑去民愈親仍  
聞過期弗予是吏奉吾命不虔也諸路監司其嚴糾劾  
六月壬戌以馬光祖參知政事己卯王爚罷知慶元府  
秋八月壬戌邊報警急詔諭呂文德等申嚴防遏乙丑  
嗣榮王與芮進封福王主榮王祀事辛未以葉夢鼎爲  
右丞相兼樞密使留夢炎知樞密院事冬十月庚申復  
開州十一月以常挺參知政事馬廷鸞同知樞密院事  
四年春正月乙巳留夢炎罷知潭州庚戌詔曰邇年近  
臣無謂引去以爲高勉留再三弗近益遠往往相尚不



知其非義也亦由一二大臣嘗勇去以爲衆望相踵至  
今孟子於齊王不遇故去是未嘗有君臣之情也然猶  
三宿出晝庶幾改之儒者家法無亦取此乎朕於諸賢  
允謂無負其弗高尚使人疑於負朕秋九月癸未蒙古  
築白河城始圍襄樊冬十月戊寅朔日有食之參知政  
事常挺罷尋卒十二月丙戌包恢罷

五年春正月癸亥葉夢鼎罷判福州以馬廷鸞參知政  
事甲戌以江萬里參知政事三月丙午蒙古將阿朮及  
宋叛將劉整自白河以兵圍樊城乙卯蒙古城鹿門已  
未詔浙西六郡公田設官督租有差辛酉京湖都統張

世傑率馬步舟師援襄樊與蒙古戰于赤灘圍敗之戊辰以江萬里爲左丞相馬廷鸞爲右丞相並兼樞密使馬光祖知樞密院事夏四月高郵縣夏世賢七世義居詔署其門五月己酉馬光祖罷提舉洞霄宮秋九月辛酉大饗明堂大赦丙寅加上皇太后尊號冬十二月戊子蒙古築南新城

六年春正月壬寅以李庭芝爲京湖安撫制置使督師援襄樊辛酉班成天曆丙寅以陳宗禮簽書樞密院事趙順孫同簽書樞密院事丁卯帝製字民牧民二訓以戒百官戊辰江萬里罷知福州三月庚子朔日有食之

癸丑詔曰吏以廉稱自古有之今絕不聞豈不自章顯而壅於上聞歟其令侍從卿監郎官各舉廉吏將顯擢焉夏四月戊寅以文天祥兼崇政殿說書六月庚午詔太極圖說西銘易傳序春秋傳序天下士子宜肄其文秋七月復開州八月甲申樂清縣嘉禾生詔薦士增四名癸巳詔賈似道十日一朝冬十月丁丑遣殿前副都指揮使范文虎總師援襄樊十一月乙未陳宗禮罷尋卒十二月己亥蒙古築萬山城是歲台安吉二州嘉興華亭二縣並水災振之

七年夏六月己未蒙古會兵圍襄陽秋八月壬辰朔日

有食之冬十月癸丑從政郎朱鑒孫進羣經要略十二月辛亥以御史陳伯大言科舉置士籍戊午詔舉廉能材堪縣令者是冬蒙古改國號曰元是歲紹興平江府安慶無爲吉和鎮巢諸州饑振之

八年春正月庚申詔曰朕惟崇儉必自宮禁始自今宮禁敢以珠翠銷金爲首飾服用必罰無貸臣庶之家咸宜體悉工匠犯者如景祐制必從重典又詔有虞之世三載考績三考黜陟幽明漢之爲吏者長子孫則其遺意也比年吏習媮薄人懷一切計日待遷事未克究又望而之他吏胥狎玩竊弄官政吾民奚賴焉繼自今內

之郎曹外之牧守以上更不數易其有治狀昭著自宜  
獎異夏五月李庭芝遣部轄張順張貴將兵援襄陽兵  
敗二將先後死之六月丙申貶資政殿大學士皮龍榮  
衡州安置道卒丁酉以章鑑同簽書樞密院事秋八月  
丙戌朔日有食之九月辛未大饗明堂大赦是日賈似  
道憾帶御器械胡顯祖輒去位詔罷顯祖出其妹貴嬪  
爲尼似道始還冬十一月乙卯馬廷鸞罷知饒州尋予  
祠十二月甲寅以葉夢鼎爲右丞相兼樞密使是歲臨  
安大雨水紹興六邑水振之

九年春正月乙丑阿朮劉整陷樊城守將范天順牛富

死之二月庚戌呂文煥以襄陽府降于元三月壬午詔  
建機速房于中書以革樞密院漏泄稽違之弊夏四月  
癸巳詔曰迺者邊吏弗戒致有襄難將士頻歲暴露邊  
民蕩析離居盡傷朕心爾聞臣專征方面宜身率諸將  
宣揚國威以賞戮用命不用命爾守臣有土有民宜申  
儆國人保固封守爾諸將尚迪果毅一乃心力各以其  
兵敵王所愾今朕多誥爾其悉聽明訓毋懈毋悞習于  
故常功多有厚賞爾不克用勸罰固不得私也又如中  
外小大臣僚有材識超卓明控御之宜懷攻守之略者  
密具以聞一如端拱二年制書朕當虚心以聽五月庚

辰詔諸人上書請以丞相似道督兵者不允餘付機速  
房六月己丑給事中陳宜中請正范文虎不力援襄之  
罰賈似道庇之只降一官癸卯京湖制置使汪立信言  
襄樊之禍皆由范文虎及俞興父子興子大忠坐貶循  
州拘管閏月丙辰朝散郎師顯行進注皇朝文鑑秋七  
月癸巳復洋州戊戌復馬騷山九月辛巳以章鑑簽書  
樞密院事陳宜中同簽書樞密院事冬十一月壬午子  
熈授左衛上將軍封嘉國公是月以陳奕爲沿江制置  
使夏貴爲淮西制置使李庭芝爲淮東制置使兼淮西  
策應使

十年春正月賈似道母死詔以鹵簿葬之似道起復視事二月己酉趙順孫罷爲福建安撫使夏四月乙卯子昂授左衛上將軍進封永國公五月壬寅張瑄表請城馬駿虎頭山或先築其一以據險要六月元主諭諸將率兵南伐且數賈似道負約執郝經之罪命水陸並進秋七月癸未帝崩在位十一年年三十五遺詔太子昱卽皇帝位八月上尊謚廟號度宗

論曰理宗季年蒙古亟陷我疆圉蓋權臣賈似道寔啓之釁度宗昏弱復拱手聽其所爲故政愈禁而敵愈迫潰敗之勢岌岌然不可支持譬如病者始終付於庸醫



至沉劇而莫悟也哀哉

### 帝熈

帝熈度宗子也母皇后全氏咸淳六年九月己丑生帝于大內九年授左衛上將軍封嘉國公十年七月癸未度宗崩奉遺詔卽皇帝位年四歲謝太后臨朝稱制甲申兄昞進封吉王弟昺進封信王賈似道依文彥博故事獨班起居丙戌上皇太后尊號曰壽和聖福太皇太后皇后曰皇太后又詔以生日爲天瑞節辛卯以朱穰孫爲京湖四川宣撫使八月癸丑大霖雨天目山崩九月癸未元兵大會于襄陽尋分兵一入淮一趨郢一徇

荆南甲午開經筵冬十月丁未饒州布衣董聲應進諸  
史纂約兵鑑刑鑑詔充史館編校文字乙卯令州縣行  
義田義役丁巳元兵犯郢州張世傑力戰禦之遂去山  
滕湖入漢戊午郢州副都統趙文義追戰金子湖死之  
乙丑以章鑑同知樞密院事陳宜中簽書樞密院事丙  
寅元兵陷沙洋城總管王虎臣與守隘官王大用皆被  
執十一月庚辰以陸秀夫爲淮東安撫制置司參議官  
丙戌以王燾爲左丞相章鑑爲右丞相並兼樞密使上  
二月癸丑元兵攻陽邏堡夏貴以兵力守都統制王達  
出戰死之丙辰元兵復攻陽邏堡都統制劉成以定海

水軍戰死夏貴敗沿江縱兵大掠歸廬州已未知漢陽  
軍王儀以城降于元是日呂文煥以元兵攻鄂州都統  
程鵬飛提舉張晏然以城降癸亥詔賈似道都督諸路  
軍馬以孫虎臣總統諸軍詔天下勤王甲子起李芾爲  
湖南提刑乙丑以高達爲湖北制置使詔邊費浩繁吾  
民重困貴戚釋道田連阡陌安居暇食有司覈其租稅  
收之庚午程鵬飛以元兵徇黃州知州陳奕降是時李  
庭芝以兵勤王

德祐元年春正月甲戌陳奕以元兵犯蘄州知州管景  
模降壬午攢度宗于永紹陵乙酉以陳宜中同知樞密

院事提舉江州興國宮呂師夔與知州錢真孫以江州  
降于元丙戌元兵徇江州知安東州陳巖夜遁邳州降  
知壽昌軍胡夢麟寓治于州自殺戊子知南康軍葉闡  
降于元戊戌池州都統張林降于元元兵犯安慶知府  
范文虎降通判夏椅仰藥死是月知德安府來興國知  
達州鮮汝忠相繼以城降于元二月庚戌元兵犯池州  
權守趙卯發自經死賈似道遣宋京如元軍請稱臣奉  
歲幣不得請而還庚申孫虎臣與元兵戰敗績奔魯港  
夏貴不戰而去似道與虎臣以單舸奔揚州諸軍盡潰  
壬戌元兵陷饒州知州唐震死之故相江萬里赴水死

通判萬道同以城降沿江制置大使趙潛知鎮江府洪  
起畏知寧國府趙與可知隆興府吳益皆棄城遁知和  
州王喜以城降于元建康都統翁福出迎元兵甲子元  
兵犯臨江軍知軍鮑廉死之賈似道上書請遷都乙丑  
詔百官議遷都左丞相王爚言已不能與大計遂去郢  
州守將張世傑帥兵入衛復饒州江西提刑文天祥以  
兵勤王丙寅以文天祥爲江西安撫副使知贛州趣入  
衛戊辰湖南提刑李芾以兵勤王知江陰軍鄭端棄城  
遁知無爲軍劉權知太平州孟之縉皆以城降于元己  
巳元兵攻嘉定都統侯興力禦死之以陳宜中知樞密

院事曾淵子同知樞密院事文及翁簽書樞密院事倪  
普同簽書樞密院事召王燾爲浙西江東宣撫招撫大  
使始遣元使郝經等歸庚午賈似道有罪罷予祠趙與  
可除名辛未右丞相章鑑遁三月壬申朔復茶鹽市舶  
法凡賈似道不恤民之政次第除之殿前指揮使韓震  
請遷都知樞密院陳宜中殺之癸酉建康都統徐旺榮  
鎮江統制石祖忠相繼降于元甲戌元兵犯無錫縣知  
縣阮應得出戰一軍皆沒應得赴水死乙亥詔諭呂文  
煥陳奕范文虎使通和議息兵以王燾爲左丞相兼樞  
密使丙子下詔罪已以陳宜中爲特進右丞相兼樞密

使侍御史陳過御史潘文卿先後奏請竄賈似道并治其黨人詔捕翁應龍下臨安府獄罷廖瑩中王庭劉良貴游汶朱浚陳伯大董襍責洪起畏鎮江自效己卯杖翁應龍刺配吉陽軍命王爚陳宜中竝都督諸路軍馬壬午復吳潛向士璧官知常州趙與鑒聞元兵至遁常民錢訢以城降于元甲申元兵犯西海州安撫丁順降乙酉知東海州施居文降于元詔加張世傑保康軍承宣使總都督府諸軍丁亥有星二鬬於中天頃之一星隕己丑加呂文福保康軍承宣使趣入衛文福至饒州殺使者入江州降于元庚寅左司諫潘文卿右正言李

可同知樞密院曾淵子兩浙轉運副使許自浙東安撫  
王霖龍相繼皆遁簽書樞密院文及翁倪普諷臺臣劾  
已章未上亟出關遁辛卯太皇太后詔榜朝堂曰我朝  
三百餘年待士夫以禮吾與嗣君遭家多難爾小大臣  
未嘗有出一言以救國者內而庶僚畔官離次外而守  
令委印棄城耳目之司既不能爲吾糾擊二三執政又  
不能倡率羣工方且表裏合謀接踵宵遁平日讀聖賢  
書自諉謂何乃於此時作此舉措生何面目對人死亦  
何以見先帝天命未改國法尚存其在朝文武官並轉  
二資其負國棄予者御史臺覺察以聞是日守將張濡



殺元行人嚴忠範于獨松關執尚書廉希賢至臨安重  
創死是月知滁州王應龍知平江府潛說友知廣德軍  
令孤慄知安東州孫嗣武岳州總制孟之紹相繼以城  
降于元丙申以陳合同簽書樞密院事夏四月壬寅統  
制洪福率衆復鎮巢軍乙巳元兵犯廣德知縣王汝翼  
與寓居官趙時晦率義兵迎戰被執死之丙午元兵陷  
沙市城都統孟紀死之監鎮司馬夢求自經死壬子以  
高斯得簽書樞密院事總統張敏與元兵戰豐城死之  
乙卯以福王與芮爲武康寧江軍節度使判紹興府庚  
申知金壇縣李成大率義局兵與元兵戰被執不屈與

二子俱死之壬戌元兵攻眞州知州苗再成等帥兵禦  
之敗績庚午元兵乘勝犯楊州都撥發官雷大震出戰  
死之姜才兵亦敗是月京湖宣撫朱禔孫湖北制置副  
使高達以江陵降于元常德鼎澧諸州皆相繼降五月  
癸酉元兵犯寧國縣知縣趙與糖出戰死之丁丑劉師  
勇復常州加和州防禦使助姚訔守常以張彥守呂城  
兵威稍振由是浙右諸城降元者復與張世傑軍合辛  
卯籍潛說友吳益呂文煥孟之縉陳奕范文虎家丙申  
詔張世傑張彥阮克已仇子眞四道出兵己亥吳繼明  
復蒲圻通城崇陽三縣以權知鄂州令擇險爲寓治六

月庚子朔日食既星見雞鶩皆歸成都安撫使皆萬壽  
以嘉定諸城降于元辛丑太皇太后詔削聖福尊號以  
應天戒命侍從官已上各舉才堪文武者五人廷臣各  
舉三人雖在謫籍亦聽舉之庚戌誅翁應龍籍其家甲  
寅留夢炎入朝王燾陳宜中竝請相夢炎自求罷詔二  
相母藉此求閒以燾平章軍國重事宜中爲左丞相夢  
炎爲右丞相竝兼樞密使都督諸路兵乙卯詔求直言  
是時知敘州郭漢傑知瀘州梅應春知富順監王崇義  
相繼以城降于元秋七月辛未張世傑與劉師勇孫虎  
臣等大山舟師與元將阿米戰焦山下元人以火矢夾

攻萬艘俱焚士投江溺死無數世傑奔圖山師勇還常  
州虎臣還真州呂城失守張彥被執降于元甲戌徙賈  
似道居婺州曾淵子雷州廖瑩中貶昭州王庭貶梅州  
寧國史楊義忠率義兵出戰死之丁丑徙賈似道建寧  
府庚寅賈似道責授高州團練副使循州安置籍其家  
追復皮龍榮官辛卯陳宜中每與王爚不協爚子熈京  
學生劉九臯等伏闕上書論陳宜中擅權黨賈似道沮  
文天祥護棄城降遁之守將又呂師夔狼子野心而使  
之通好乞盟張世傑步兵而用之於水劉師勇水兵而  
用之於步恐誤國不止一似道也宜中徑去遣使四輩

召之不至尋下九臯等于臨安獄罷燾爲醴泉觀使  
未以陳六龍同簽書樞密院事丙申以開慶兵禍追罪  
史嵩之奪其謚八月壬寅右正言徐直万遁以李芾爲  
湖南鎮撫大使知潭州乙巳吳繼明復平江縣庚戌劉  
師勇復呂城甲子以文天祥爲浙西江東制置使知平  
江府九月辛巳大饗明堂赦丙戌會稽縣尉鄭虎臣部  
送賈似道之貶所至漳州殺之元兵犯泰州知州孫虎  
臣自殺冬十月己亥加張世傑沿江招討使劉師勇福  
州觀察使總統出戍兵丁未以留夢炎爲左丞相陳宜  
中爲右丞相並兼樞密使壬戌元將伯顏發建康分道

來侵是月李世脩以江陰降于元元兵圍潭州知州事  
李芾力戰禦之十一月庚午以陳文龍同知樞密院事  
黃鏞同簽書樞密院事戊寅元兵陷廣德軍已卯陷四  
安鎮正將胡明等死之召文天祥入衛壬午元兵犯隆  
興府黃萬石棄撫州遁轉運判官劉槃以隆興降于元  
甲申元伯顏兵攻常州數月不下城陷屠其民知州姚  
訔通判陳炤都統王安節竝死之劉師勇突圍走臨安  
己丑元兵陷獨松關馮驥死之張濡遁鄰邑望風皆遁  
辛卯元兵陷撫州都統密佑死之甲午權禮部尚書土  
應麟遁乙未左丞相留夢炎遁十二月庚子以吳玠簽

書樞密院事遣柳岳奉書詣元軍稱盜殺廉尚書乞班  
師脩好癸卯以陳文龍參知政事謝堂同知樞密院事  
丁未元兵入平江府遣使召留夢炎王應麟皆不至戊  
申張世傑入衛癸丑遣宗正少卿陸秀夫刑部尚書夏  
士林兵部侍郎呂師孟使元軍詔呂文煥趙孟桂通好  
庚申復遣柳岳等詣元軍祈請至高郵民殺之元兵破  
大洪山知隨州朱端履降癸亥復遣使召留夢炎不至  
二年春正月乙丑朔元兵陷潭州知州李芾拒守力盡  
闔門死之守將吳繼明劉孝忠以城降寶慶亦降通判  
曾如騏死之陸秀夫等至元軍求稱姪納幣不從稱姪

孫不從戊辰陸秀夫等還太皇太后命用臣禮己巳嘉興守劉漢傑以城降于元庚午參知政事陳文龍上疏歸養以黃鏞參知政事辛未以吳堅爲左丞相兼樞密使常林參知政事日午宣麻慈元殿文班只六人諸關兵盡潰是日遣監察御史劉岳奉表稱臣于元上元主忽必烈尊號曰仁明神武皇帝歲奉銀絹二十五萬乞存境土以奉蒸嘗癸酉左司諫陳孟虎監察御史孔應得遁甲戌元兵犯瑞州知州姚岩遁丁丑以夏士林簽書樞密院事數日遁己卯參知政事常林遁三學生誓死不去持與放釋褐出身是日元兵犯安吉州知州趙



良淳自經死癸未進封兄昂爲益王判福州弟昺爲廣  
王判泉州以留夢炎爲江東西湖南北宣撫大使甲申  
元兵至阜亭山遣監察御史楊應奎上傳國璽降奉表  
稱臣祈存宗社是夜丞相陳宜中遁張世傑蘇劉義劉  
師勇各以所部兵去乙酉以文天祥爲右丞相兼樞密  
使都督丙戌以家鉉翁簽書樞密院事賈餘慶同簽書  
樞密院事知臨安府命文天祥同吳堅使元軍元人拘  
天祥於軍中堅還戊子知建德軍方回知婺州劉怡知  
處州梁椅知台州楊必大皆降于元是月知臨江軍滕  
岩瞻遁二月丁酉朔日中有黑子相盪如鵲卵辛丑詔

諭郡縣使降元元將伯顏遣人入臨安封府庫收史館  
禮寺圖書及百司符印告敕壬寅遣賈餘慶吳堅謝堂  
劉岳家鉉翁充祈請使元拘賈餘慶等及文天祥于軍  
中是日元兵屯錢塘江沙上太皇太后望祝曰海若有  
靈當使波濤大作一洗而空之潮三日不至益王廣王  
奔溫州是月夏貴以淮西降于元知鎮巢軍洪福死之  
三月丁丑元伯顏入臨安執張濡殺之以帝及皇太后  
全氏度宗母夫人黃氏宗室福王與芮等北去官屬三  
學生皆從行惟太學生徐應鑣及二男一女赴井死時  
宮女百人赴水死夏五月丙申元主忽必烈以帝爲瀛

國公是月陳宜中等立益王昀于福州遙上帝尊號曰  
孝恭懿聖皇帝

論曰宋至德祐疆土存者無幾及行都陷幼帝與太后  
入燕二王雖奔餘枿其能殖乎太后爲尼帝學佛帝長  
自悼羈旅賦思歸之詩讀之可爲於邑子曰完普元季  
有託宋名號起兵者遂遷之沙州云

端宗

帝昀

端宗裕文昭武愍孝皇帝名昀度宗長子也母淑妃楊  
氏度宗崩謝太后召賈似道等入宮擬所立衆謂帝長  
似道利幼君乃立嫡是爲孝恭懿聖皇帝而封帝爲吉

王弟昺爲信王德祐二年正月元兵迫臨安乃封帝爲益王判福州昺爲廣王判泉州以駙馬都尉楊鎮及楊亮節俞如圭爲提舉元兵至阜亭山鎮等奉之走婺州伯顏入臨安遣兵趣婺召鎮以王還鎮聞之曰我將就死於彼以緩追兵亮節等遂負帝及昺徒步匿山中七日走溫州陸秀夫蘇劉義繼追及於道遣人召陳宜中于清澳宜中來謁復召張世傑于定海世傑亦以所部兵來溫之江心寺高宗南奔時嘗至是有御座在寺中衆相率哭座下奉帝爲天下兵馬都元帥廣王副之太皇太后尋遣一宦者以兵八人來召帝及廣王還宜中

等沉之江中遂入閩五月乙未朔陳宜中等乃奉帝卽  
皇帝位于福州改是年爲景炎元年升福州爲福安府  
冊楊淑妃爲皇太后同聽政進封弟昺爲衛王以陳宜  
中爲左丞相兼都督李庭芝爲右丞相陳文龍劉黻參  
知政事張世傑陸秀夫簽書樞密院事蘇劉義殿前都  
指揮使王剛中知福安府劉黻未至卒詔吳浚趙潛傳  
卓李珪翟國秀等分道出兵是日郊赦黎明有大聲出  
府中衆皆驚仆文天祥自鎮江亡歸以爲右丞相兼知  
樞密院事遣其將呂武入江淮招豪傑杜濬如溫州募  
兵是月召揚州守將姜才爲保康軍承宣使元兵犯衢

州故相留夢炎降江西制置使黃萬石率所部降經略使知廣州徐直諒聞江西湖南已降元遣人赴江西送款六月丁卯元呂師夔遣兵徇廣州直諒聞帝卽位于閩遣將拒元兵于石門敗績奔還直諒遁元將入州授奔還諸將官有黃俊者拒不受死之丙子吳浚聚兵于廣昌復南豐宜黃寧都三縣翟國秀復秀山傅卓至衢信諸縣民多應者詔右丞相文天祥同都督諸路軍馬秋七月丁酉文天祥開府南劍州經略江西是月吳浚兵敗翟國秀引還傅卓兵敗降于元李庭芝姜才自揚州赴召至泰州揚州守將朱煥泰州裨將孫貴皆降于

元庭芝才被執死之八月漳州亂命陳文龍爲閩廣宣撫使討之張世傑遣兵助吳浚與元將李恒戰兵敗奔寧都是月元兵陷真州守將苗再成死之九月以興化石手軍亂復命陳文龍知興化軍東筦人熊飛與新會令曾逢龍相繼起兵會趙潛遂復韶州廣州元呂師夔等聞之引兵入梅嶺冬十月壬戌朔趙潛遣曾逢龍就熊飛禦元兵于南雄逢龍戰死飛奔韶州守將劉自立以城降飛率兵巷戰兵敗赴水死呂師夔等屠韶州授自立招討使時元兵分三道來侵十一月元將阿剌罕董文炳犯處州李珣以城降甲辰秀王與釋逆戰于瑞

安觀察使李世達死之與擇及其弟與慮子孟備監軍  
趙由瑒察訪使林溫被執皆死阿刺罕兵至建寧府執  
守臣趙崇錢知邵武軍趙時賞知南劍州王積翁竝棄  
城遁乙巳陳宜中張世傑以元兵漸迫奉帝及衛王楊  
太后以下俱航海時兵衛幾五十萬人由東港入海與  
元兵遇天霧晦不辨舟得以進癸丑元阿刺罕犯福安  
府府尹王剛中以城降兵部侍郎朱浚仰藥死帝至泉  
州招撫使蒲壽庚作亂遂如潮州是月英德守臣凌彌  
堅徐夢得等降于元十二月辛酉朔趙潛棄廣州遁乙  
丑制置使方興亦遁吳浚退走入瑞金戊辰蒲壽庚及



知泉州田真子以城降于元乙酉興化軍通判曹澄孫以城降于元知軍陳文龍被執死之帝舟次惠之海豐圖復廣州呂師夔等以軍餉不繼退走以梁雄飛守之時經略使劉應龍導帝舟至廣州港口轉運使姚良臣作行宮迎帝入州治元兵守江者拒之不果入帝舟還大海駐師秀山尋次于惠州之甲子門郡人龍圖閣待制張鎮孫家居集海上潰軍與都統凌震集鄉兵潛分東西二路圖恢復詔以鎮孫爲廣東制置使兼經略安撫使

二年春正月元兵破汀關壬寅吳浚棄瑞金遁文天祥

奔漳州浚尋降于元是月知循州劉興知潮州馬發知  
梅州錢榮之相繼以城降于元二月元兵略廣州廣東  
諸郡皆降帝舟次廣之梅蔚三月文天祥復梅州陳文  
龍從子贇舉兵殺守將林華復興化軍夏四月文天祥  
復興國縣張鎮孫復廣州元梁雄飛出走帝舟次廣之  
官富塲五月張世傑將兵復潮州文天祥提兵自梅州  
出江西入會昌縣淮民張德興亦起兵應之六月辛酉  
文天祥復雩都秋七月文天祥遣兵復吉贛諸縣衡山  
人趙璠撫州人何時皆起兵應之乙巳張世傑遣將高  
日新復邵武軍八月文天祥諸將兵皆敗乃引兵卽鄒

瀕于永豐瀾兵亦潰壬申文天祥兵敗于興國甲申文  
天祥至空坑兵盡潰挺身奔循州諸將皆為元將李恒  
所執元遣將塔出哈喇歹等趨廣州九月戊申元將也  
的迷失陷邵武軍入福州帝舟次廣之淺灣張世傑帥  
師援廣州安撫使方興出禦塔出于石門戰敗冬十月  
甲辰元將唆都陷興化軍陳瓚死之乙巳張鎮孫集戰  
船二千艘及塔出呂師夔大戰于海珠寺敗績十一月  
元將塔出與呂師夔圍廣州張鎮孫及侍郎譚應斗以  
城降劉深攻帝于淺灣張世傑戰敗乃奉帝退保秀山  
陳宜中入占城遂不反十二月丙子帝至井澳颶風大

作舟敗幾弱帝驚悸成疾旬餘諸兵士稍稍來集死者  
十四五丁丑元將劉深追帝至七州洋執衛王提舉官  
俞如圭以歸

三年春正月元將不花陷重慶府制置使張珪死之西  
川州郡俱陷二月呂師夔以張鎮孫及其妻子赴燕鎮  
孫自經死于庾帝舟還廣州元將唆都破潮州屠其城  
擢知州事馬發死之三月文天祥復惠州都統凌震及  
轉運判官王道夫復廣州帝欲往居占城不果遂駐化  
之硃洲會淵子自雷州來以爲廣西宣諭使夏四月戊  
辰帝崩于硃洲年十一衛王昺立上尊諡廟號端宗

帝昺度宗第三子也母脩容俞氏累封衛王景炎三年  
四月戊辰端宗崩衆欲散去簽書樞密院事陸秀夫不  
可越二日庚午與衆奉帝嗣位于硤洲時年八歲楊太  
后仍同聽政以陸秀夫爲左丞相兼樞密使以張世傑  
爲樞密副使加少傅蘇劉義爲開府儀同三司殿前都  
指揮使是月有蜃龍見海中五月癸未朔改是年爲祥  
興元年乙酉升硤洲爲翔龍縣遣張應科王用取雷州  
應科與元兵三戰皆不利用遂降于元六月丁巳張應  
科與元兵戰雷州死之知高州李象祖降于元己未帝  
徙居新會之厓山造軍屋三千間行宮三十間正殿曰

慈元楊太后居之己巳有大星隕于廣南聲如雷數刻  
乃己庚辰升廣州爲翔龍府秋八月庚申月貫南斗乙  
丑右丞相文天祥母喪起復以天祥兼樞密使都督諸  
路兵馬己巳加張世傑太傅封越國公文天祥少保封  
信國公壬申以姚良臣爲右丞相夏士林參知政事王  
德同知樞密院事九月葬端宗于永福陵冬十月元蒙  
古漢軍數路竝進張弘範以舟師由海道襲漳州惠三  
州李恒以步騎由梅嶺襲廣州阿里海牙遣人招安撫  
使趙與珞及冉安國黃之傑等于瓊州不從率兵禦之  
十一月癸巳瓊州民作亂執趙與珞等降于元趙與珞

冉安國黃之傑皆死之閏月李恒兵至清遠王道夫迎戰大敗恒遂擊凌震海上又敗將吏宋邁等二百人力戰皆被執奪三百艘庚戌道夫棄廣州遁壬戌震遁癸亥恒入廣州以待弘範十二月壬午王道夫攻廣州與李恒戰兵敗被執凌震兵繼至亦敗文天祥趨海豐壬寅元兵執文天祥于五坡嶺凌震兵亦敗于芟塘震走厓山與翟國秀軍合

二年春正月己酉朔帝在厓山丁巳登海舟壬戌元張弘範率兵侵厓山庚午李恒兵亦至張世傑以舟師碇海中棊結巨艦千餘中艦外舳貫以大索四周起樓棚

如城堞艦皆塗泥縛長木以拒火舟弘範至港口呼世傑與語不從文天祥在弘範軍中弘範令天祥以書諭世傑天祥亦不從世傑使前鋒將周文英挑戰十餘合皆敗弘範益舟師據海口我師不得進退樵汲路絕兵士茹乾飲鹹旬日皆病世傑猶率蘇劉義方興等日大戰弘範遣人語厓山士民曰汝陳丞相已去文丞相已執汝何戰爲士民亦無叛者二月癸未有黑氣出山西是日李恒乘早潮退攻于北張世傑以淮兵殊死戰至午潮上張弘範攻于南南北受敵軍士困甚俄一舟檣旗仆諸舟檣旗遂皆仆世傑知事去乃抽精兵入中軍



諸軍潰翟國秀凌震及劉俊等解甲降會暮且風雨昏  
霧四塞世傑與蘇劉義斷維以十餘舟奪港而去陸秀  
夫走帝舟帝舟大且諸舟環結度不得出走乃負帝投  
海中後宮嬪御及羣臣多從死者越七日浮尸十餘萬  
人元卒有求物尸間者遇一尸小而晝衣黃衣負詔書  
之寶取寶以獻弘範弘範亟往求之已不獲矣遂以帝  
崩報年九歲楊太后聞之撫膺大慟曰我忍死間關至  
此者正爲趙氏一由肉爾今無望矣亦赴海死世傑葬  
之海濱已而世傑亦自溺死其隨帝赴水死者禮部尚  
書徐宗仁等見忠義傳江南競傳帝在占城元主忽必

烈詔追捕帝及陳宣中宋之遺民推奉工部侍郎馬南  
寶爲帥副以制置使黎德招討使梁起莘以迎駕起兵  
衆至二十萬爲元總管王守信所敗起莘降元德與南  
寶皆死之宋自建隆至是凡三百二十年而亡是年乃  
元至元十六年也

論曰恭帝之北遷也二王南走海徼其臣相繼擁  
立圖興復勢孤運窮綫緒竟絕蓋符汴杭閩廣之  
讖云按宋都汴百六十八年南渡復歷百五十二  
年享國之久幾與漢埒視唐則過之昔范曄論漢  
中興由高祖孝文之寬仁結於民而不能忘歐陽

脩論唐之祖宗德澤制度足爲後世賴故能永其  
天命若宋家之積仁厚尚禮義其效亦豈誣哉獨  
惜丁宇宙極亂之會見滅於夷虜我

明太祖高皇帝起而驅除之趙氏之恥其亦少雪乎

宋史新編卷十四